

SARS E HIRA BAHLEKSI BAO PELE BA NENG BA SEBELETSA MEKGATLO YA PRAEVETE

16 Loetse 2020, Pretoria - Ditshebeletso tsa Lekgetho tsa Afrika Borwa (SARS) di nkile mohato o sa tlwaelehang ka ho hira basebetsi ba hlwekisang ba fetang 700, bao pele ba neng ba le tlasa kontraka, ho ba basebetsi ba ka dinako tsohle.

Ka dilemo tsa ho feta SARS e ne e ntse e hira ditshebeletso tsa tlhwekiso ka tsela ya dikontraka bakeng sa diofisi tsa yona, empa ka lebaka la dikontraka tse neng di fela selemo ka seng, mokgatlo o ile wa qala ka projeke ya ho etsa hore basebetsi bana ba hlwekisang e be karolo ya basebetsi ba ka dinako tsohle. Boiteko bona bo tla etsa hore basebetsi ba hlwekisang ba 769 e be karolo ya basebetsi ba SARS ho tloha ka la 31 Mphalane 2020.

Nakong eo a neng a hlalosa qeto ena, e leng e sa tshwaneng le tlwaelo ya ho etsa hore 'mosebetsi oo e seng wa mantlha' e be ona o etswang ke mekgatlo e kantle, Khomeshenara Kieswetter o itse: "Le ha ka dinako tse ding e le bohla hore tse ding tsa ditshebeletso di etswe kantle ho mokgatlo, mohlala; tlhwekiso ya dibaka le tsa tshireletso, ha se ka mehla moo sena se tswelang batho ka bonnotshi ba bona molemo. Nakong eo re neng re lekola botjha ho ntjhafatswa ha ditshebeletso tsena, re lemohile hore ditlhokeho tsa rona tse fokotsehileng tsa tlhokeho ya sebaka sa ofisi di tla qetella di bakile hore le tshibeletso e fokotsehe mme feela jwalo le ka basebetsi, mme le ha re ka qetella re kgethile moiketi ya itseng, sena se tla qetella se bile le kgahlamelo e mpe hodima palo e kgolo ya basebetsi mme sena se bake mathate bakeng sa e mong le e mong ya amehang mona.

"Re ne re bile re batla hore basebetsi bana ba ikutlwe ba phutholohile ebile ba na le lehae hobane hantlentle le ha ba ne ba se na kontraka ya ka dinako tsohle le rona, feela ba ne ba sebeletsa SARS. Tlhophiso ena e ntjha e tlisa tiisetso ya mosebetsi le seriti ho batho bana ba amehang tabeng ena. Nakong eo re neng re lekola qeto ena ya rona, re lemohile hore ho na le palo e itseng ya bahlwekisi ba nang le mangolo a thuto a lekaneng, mme ba na le bokgoni ba ho ka ntshetswa pele hore ba tle ba fetele mesebetsing e meng ka hara SARS, ho feta moo ba ka nna ba fumana le mesebetsi ka ntle ho SARS. Naheng ena ya rona e nang le dipalopalo tse hodimo tsa batho ba sa sebetseng, re ne re keke ra etsa qeto e neng e tla etsa hore batho ba ka bang 300 ba fellwe ke mesebetsi ya bona. Ke kgotsofaditswe ke hore re kgonne ho ntlafatsa maphelo a batho ba amehang ntle le hore SARS e be le ditjeo tsa tlatsetso."

Basebetsi ba kgethetsweng ho tswela pele ka mesebetsi e meng ba tla fuwa bokgoni ke mekgahlelo e meng a ka hara SARS le ho behwa dikgeong tsa mesebetsi ha dikgeo tsena di hlahella ka hara mokgatlo, hore ba tle ba tsebe ho tswela pele ka mokgwa o profeshenale.

Ka lebaka la dipalopalo tse hodimo tsa tlhokeho ya mesebetsi ka hara naha, SARS e motlotlo ho tlisa phapang maphelong a baahi ba Afrika Borwa, bao jwalo ka basebetsi ba ka dinako tsohle, le bona ba tlang ho fumana melemo e kang ya ho ba ditho tsa Letlole la Basebetsi ba Mmuso la Penshene (GEPF), sekema sa kalafo le inshoreense ya bophelo jwalo ka karolo ya paloyohle ya meputso ya bona.

SARS ha jwale e ntse e sebetsana le tsela e tshwanang le ena mabapi le ditshebeletso tsa rona tsa tshireletso ntweng ya rona ya ho fokotsa tlhokeho ya mesebetsi naheng ya rona.